

Қуръон, унинг ҳофизлари ва муаллимларининг фазилатлари | Қуръони Карим дарслари (149-дарс)



19:00 / 21.04.2025 1792

Аллоҳ таолонинг фазли марҳамати ила Қуръон Карим силсилавий дарсларимизни Ўзидан ёрдам сўраган ҳолимизда давом эттиришни мақсад қилдик. Навбатдаги дарсимиз «Ҳадис ва ҳаёт» силсилавий асарнинг 30-жузи «Қуръон фазилатлари» китоби асосида бериб борилади. Аллоҳ таоло барчаларимизга Қуръонга мувофиқ яшашимизда Ўзи тавфиқ берсин!

Қуръони Каримнинг ўзига хос тавсифини қилишга инсоннинг тили ҳам, қалами ҳам ожиз.

Бу улуғ Китобнинг энг олий васфи уни нозил қилган Зот – Аллоҳ таолонинг Ўз Китобида келтирган ояти карималаридир.

Кўпдан буён Қуръони Карим ҳақида шу Китобнинг ўзида келган оятларни бир жойга тўплаб, ўқувчиларга тақдим қилиш ниятимиз бор эди. Қулай фурсат келганида ана шу орзунга амалга оширишга қарор қилдик.

Аммо баъзи бир эътиборларга кўра, ҳамма оятларни келтира олмадик. Келтирган оятларимизни ҳам турли мавзуларга бўлиб, ораларига инсоний сунъийлик қўшгимиз келмади.

Аввал шарҳ қилаётган китобимизда келган уч ояти каримани келтириб туриб, кейин бошқаларини келтиришни лозим кўрдик.

عَلَّامَاتٌ لِّلْآلِق:

﴿٨٠﴾ الْعَالَمِينَ رَبِّ مَن تَزِيلُ ﴿٧٩﴾ الْمُطَهَّرُونَ إِلَّا يَمْسُهُ لَا ﴿٧٨﴾ مَكْنُونٍ كَتَبَ فِي ﴿٧٧﴾ الْكُرْآنِ لِقْرَأَانِ إِنَّهُ

Аллоҳ таоло:

«Албатта, у Қуръони Каримдир. Сақланган китобдадир. Уни фақат покланганларгина ушлайдир. Оламларнинг Робби (томони)дан нозил қилингандир», деган («Воқеа» сураси, 77-80-оятлар).

Қуръони Каримнинг ўзини ва сифатларини баён қилувчи ушбу оятлардан олдин келган ояти карималарда Аллоҳ таоло юлдузларнинг жойлари билан қасам ичган.

Оятларда юлдузларнинг жойлари билан қасам ичишдан мақсад Қуръони Каримни тасдиқлашдир.

Демак, Аллоҳ таоло қасам ичиб, қуйидаги ҳақиқатларни таъкидламоқда.

«Албатта, у Қуръони Каримдир».

Албатта, ўша Муҳаммад алайҳиссаломга туширилган ва динсизлар инкор қилаётган нарса – Қуръони Карим.

«Сақланган китобдадир».

Яъни, Қуръони Карим ўзгариш, алмаштиришдан ва барча сақланиш лозим бўлган нарсалардан сақланган, Лавҳул Маҳфуз деб номланган китобдадир. Шундай бўлганидан кейин Қуръони Карим ҳам ўзгаришдан, алмаштиришдан ва барча сақланиш лозим бўлган нарсалардан сақланган Китобдир.

«Уни фақат покланганларгина ушлайдир».

Яъни Қуръони Каримни Аллоҳ таоло томонидан ҳам моддий, ҳам маънавий жиҳатдан турли нолайиқ нарсалардан покланган фаришталаргина ушлайдилар. Бошқалар ушлай олмайдилар.

Шунингдек, Қуръони Каримни жанобатдан ва кичик нопокликлардан тозаланиб, ғусл ва таҳорат қилган мўмин-мусулмонларгина ушлайдилар. Қуръони Каримни ушлаш учун таҳоратли бўлишнинг вожиблиги ҳақидаги ҳукм ушбу ояти каримадан олинган.

Ушбу ояти кариманинг маъноси ҳам, ҳукми ҳам Қуръони Карим Аллоҳнинг наздида қанчалик улуғ эътиборга сазовор эканини яққол кўрсатади.

«Оламларнинг Робби (томони)дан туширилгандир».

Ҳа, Қуръони Карим тўлалигича, ҳар бир ҳарфигача барча оламларнинг Робби, Холиқи, Розиқи, Тарбиячиси ва Тадбирини қилувчиси бўлмиш Аллоҳ таоло томонидан туширилгандир. Унинг бирор ҳарфи ҳам Аллоҳдан бошқага мансуб эмас.

سَلَاغَاتٍ لِّأَقْو:

﴿مُيِّنًا نُورًا إِلَيْكُمْ وَأَنْزَلْنَا رَحْمَةً مِّنْ بُرْهَانٍ جَاءَكُمْ فَذُكِّرُوا بِهَا﴾

Аллоҳ таоло яна:

«Эй одамлар! Батаҳқиқ, сизга Роббингиздан бурҳон келди ва сизга очиқ-ойдин нурни нозил қилдик», деган («Нисо» сураси, 174-оят).

Ушбу бурҳон Қуръони Каримдир.

Ушбу бурҳон Аллоҳ таоло ягоналигининг бурҳонидир.

Ушбу бурҳон Пайғамбар алайҳиссаломнинг ҳақликлари бурҳонидир.

Ушбу бурҳон Исломнинг икки дунё саодатига элтувчи дин эканининг бурҳонидир.

Аллоҳ таоло Ўз бандаларига раҳм этиб, уларга икки дунё бахтига эришиш дастури қилиб нозил этган бу Қуръон аниқ нурдир.

«Ҳадис ва ҳаёт» китобининг 30-жузи «Қуръон фазилятлари» китоби асосида тайёрланди.

